

**Atuarfimmi pisortat perorsaanermi aqutsinissamut piffissaqarnerulernissaat anguniarlugu atuarfimmi allatsitut ilinniarnissamut periarfissaasut misissorneqarnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinermi piginnaasatigut nukittorsaanissamut pisariaqartitsineq nassuiarneqassaaq, ilinniarneq sorleq tulluunnerunersoq, aningaasartuutissatut kingunerisassai aammalu ilinniarfimmi atuutereersuni ilinniarsinnaanngornissaq periarfissaanersoq. Misissuinermi kingusinnerpaamik UKA2021-mi saqqummiunneqartussamut soqutigisallit sammisamullu attuumassusillit ilanngunneqarniarsarissapput.**

(Inatsisartuni ilaasortaq, Nivi Olsen, Demokraatit)

### **Akissuteqaat**

(Ilinniartitaanermut, Kultureqarnermut, Ilageeqarnermullu Naalakkersuisoq)

### **Siullermeerneqarnera**

Naalakkersuisut Inatsisartuni ilaasortaq Nivi Olsen, Demokraatineersoq, aalajangiinissamik siunnersuutaanut qutsavigaat.

Naalakkersuisut siunnersuuteqartoq isumaqatigaat, meeqqat atuarfiata ingerlaavartumik nukittorsarnissaanut ineriartortinnissaanullu atuarfiit pisortaasa ilinniagaqarsimasut pisariaqartuunerannik oqariartuuteqarmat. Naalakkersuisut meeqqat atuarfiannik pitsaanerusumik pitsaanerusunillu angusaqartartumik pigisaqarnissarput pingaartitaasa ilagaat, inuusuttut amerlanerit meeqqat atuarfiat naammassiinnarlugu ilinniarfimmut ilinniakkamik naammassinniffiusartunut ingerlaqqittarniassammata.

Siunnersuutip oqaasertalersugaaneratigut paasinarpoq, atuarfiup allattaatut Kalaallit Nunaanni ilinniakkap qanoq meeqqat atuarfianni perorsaanermik aqutsineq pitsanngortissinnaatigineraa.

Tamatumunnga tunngatillugu Naalakkersuisut oqarusupput, ilinniarfeqarfitta ilaat, Niuernermik Ilinniarfik, Pisortatut Ilinniarfik aqutigalugu, atuarfinni allatsimut ilinniaqqinnermik immikkoortukkuutaartumik neqerooruteqareermat.

Ilinniarneq taanna kommunit Pisortatullu Ilinniarfiup suleqatigiillutik pilersitaraat. Ilinniarneq siullermeertumik 2020-p ukiaani neqeroorutigineqarpoq, COVID-19-illi atugaanera pissutigalugu ilinniarnep aallartinnissaa 2021-p upernarneranut kinguartinneqarluni.

Atuarfiup allattaatut ilinnialissagaanni ullumikkut HK-mik/TNI-mik ilinniagaqarsimanissaq piumasqaataavoq. Pisortatut Ilinniarfimmi atuarfiup allattaatut ilinniarneq HK-mik/TNI-mik ilinniarnep taassumaluunniit assigisaa qaavatigut ilinniagaavoq. Meeqqat atuarfianni allaffissornikkut suliasat ilinniarnerisa saniatigut ilinniaqqinnermi tassani inuttut

piginnaasaqarfiit, attaveqaqatigiittarneq, sulianik ingerlatsineq, inunnik paasissutissat pillugit inatsit (persondatalov) kiisalu suliniutinik pilersaarusiortarneq ilinniagarineqartarput.

Ilinniartitaanerup aaqqissuussaana eqaatsoq ataqatigiittumilu inassuteqaatini aamma inassuteqaataavoq, meeqqat atuarfianni allatsitut ilinniagaqartut pinngitsooratik ilinniagaqaqqittarnerisa allatsit nutaanik piginnaasaqarfeqartilissagaat, piffissap ingerlanerani suliassanik annertunerusunik suliqaarsinnaalersillugit. Tamatuma kingunerisaanik Naalackersuisut meeqqat atuarfiata nutarterneqarnissaani tulliuttumi suliaminnut ilagitillugu ersarissaallutik paasinariusuppaat, meeqqat atuarfianni allatsit pinngitsooratik ilinniagaqaqqittarnissaannut suut naammassineqareersimassanersut suullu aaqqissuussinerup taassuma kingunerissanerai, tassunga ilanngullugu tamatuma qanoq inatsisinngortinnissaa paasinarneqassalluni. Suliap tamatuma ilagissavaa ilinniakkap taama ittup sulinermut isumaqatigiissutitut attuumassutaasa qulaajarneqarnissaat. Taakkua saniatigut Pisortatut Ilinniarfimmi meeqqat atuarfianni allatsit immikkoortukkuutaartumik ilinniarteqqittarneranni misilittakkat ilanngunneqarsinnaassapput. Meeqqat atuarfiata inatsisaata nutarterneqarnerani oqartussaasut allat soorunami aamma ilaatinneqartussaapput.

Taaneeqartut taakkua patsisigalugit allannguutissatut siunnersuut una saqqummiunneqarpoq:

“Atuarfik pillugu Inatsisartut inatsisaata nutarterneqarnissaani tulliuttumi suliamut ilagitillugu atuarfimmi pisortat perorsaanermi aqutsinissamut piffissaqarnerulernissaat anguniarlugu atuarfimmi allatsitut ilinniarnissamut periarfissaasut misissorneqarnissaannut Naalackersuisut peqquneqarnissaannik Inatsisartut aalajangiiffigisassaattut siunnersuut. Misissuinermi ilinniakkatigut nukittorsaanissamut pisariaqartitsineq, ilinniarneq sorleq tulluunnerunersoq, aningaasartuutissatut kingunerisassat aammalu ilinniagaqarnerup ilinniarfimmi atuutereersuni ilinniarsinnaangornissaa periarfissaanersoq nassuiarneqassapput.”